

豬寮成--á kap A 麗

電台 iah 是電視台 chhiàng-chāi 有無牌 ê 醫生 iah 藥劑師 leh 賣藥 á 廣告順續講醫學。我有 kóa 煩惱，身體 ê 構造是真複雜--ê，有真 chē 病症到 taⁿ 醫學上 iáu chhōe 無適當 ê 醫療法 tō，全世界投入醫學研究 ê 人、財力有夠 chē，m̄-koh 並無開發出來百面成功 ê 藥 á iah 是技術。koh 講，這個時代 mā iáu 有「絕症」ê 存在，無受過專業訓練 iah 無醫療執照--ê iáu 是尊重專業 khah 好。

醫療需要專業訓練 kap 醫藥、器材設備，人口 khah 密 ê 城市當然就 khah 有合格 ê 醫生館，庄 kha 所在醫療免講 mā khah 落伍，在來 tiòh-ái oá 靠草藥 á、偏方、赤 kha 先 á 這類 ê 自力救濟。我做 gín-á 生活 ê 庄 kha 就無 gah 1 間醫生館，若 m̄ 是真傷重 ê 破病就 hioh--1-下，倒--1-下，看 ka-tī 會好-- bē。上 chē 是食人專門 thèh 來寄 ê 便藥 á，he 是普通腹 tó 疼、感著風邪 iah 是漏屎，這款輕症頭 chiah 食會行氣，若 tú 著真正 pháiⁿ 剃頭--ê，mā tiòh chhiàⁿ 貸切 á 車去市內 ê 大病院。

我 beh 講 góan 庄-- nih 頭 1 個赤 kha 先 á，照這 chūn ê 講法應該是「密醫」，就是無牌 ê 醫生，為著合故事時代背景 ê 氣氛，我 iáu 是講赤 kha 先 á，i 本名是「成--á」，phāiⁿ 藥箱 á 做先生了後，身分應該有 khah kōan，m̄-koh 庄 kha 人 bē-hiáu beh 尊 chhūn，mā kāng 款叫 i「成--á」，極加是患者為 beh hō i 歡喜，當 i ê 面稱呼「豬寮成--á」。成--á 原本 kap 醫學 1 sut-á 牽聯都無，去做兵 soah hō 頂司派去軍醫是做小使 á，就是這 chūn 講 ê 「工友」，人講「曲館邊 ê 豬 á 聽久 mā 會 phah 拍」，成--á 退伍了後。講 i 是軍中 leh 做醫生，有學著上現代 ê 醫術，為 beh 證明 i 真正是內行--ê，koh 專門講 1 kóa 醫生話，上捷講--ê 是「你需要治療」，庄 kha 人無智識，聽走精--去，kā 「治療」聽做「豬寮」，想講「豬 m̄ chiah 需要豬寮」，也 m̄ 敢 siuⁿ 問，kan-taⁿ 稱呼 i 「豬寮成--á」表示尊重。

我做 gín-á ê 時身體無勇，到這時 mā kan-taⁿ 大箍把好看頭 niâ ，3 頓飽藥罐 á 無離手。Tī hit 款 pha 荒 ê 時代，gín-á 人 lóng gâu 腹 tó 疼 kāu bīn 蟲，若無 kài 傷重，就食 bīn 蟲藥 á 就準 tú 好，有 1 款 bīn 蟲藥 á 是做 gah ná 餅 -- leh ，食--起-來 koh 甜甜，gín-á iau-kúí 無腹 tó 疼 mā 會假病 thèh 來做糖 á 食，大人看 m̄ 是勢，就 hoan 附寄藥包 á-- ê máí khng hit 款甜 ê bīn 蟲餅。有 1 pái ，我半暝腹 tó 實在是疼 gah chih-chat bē tiâu ， a-pa 本底就無 leh 信 hit 個 Hau-siâu 成--á ，到這個 khám 站， a 公講：「 khah 苦 ah tiòh 請 i 來」，總--是 bē tàng 看 i ê 金孫 tī 眠床頂 siak 來 siak 去，目 chiu 金金人傷重。

A-pa kap 成--á 自早就無好， tī 成--á iáu 未做兵 chìn 前，bat 參加割稻 á 班， sí-kòe 去趁工，輪著 kah 成--á kāng kâⁿ 踏機器桶-- ê lóng 嫌講成--á 無 lám 無 ne ，連 1 sùt-á 力都 m̄ 出， kap i kap-kâⁿ 真食監，成--á hit 支嘴 koh 真破格，特別興 kap 人相諍，人 leh 講拜佛燒金 ê tāi-chì ， kap i 也無 tī-tāi ，會笑人迷信，講無 chhái 人 ê 錢買紙燒燒--掉；人講今年苦瓜好價， ták-ê siáu leh 糴籽，i 就 chhiàng 講 mê 年一定大落，hōan-sè 價 siáu 落 gah 無夠肥料錢。有 1 年 góan a-pa 就種 5 分外地 ê 苦瓜，頂年 iáu 是 chiok 好價，hō 破格成--á hit 1 支破格嘴講一下 soah 有影落 gah 車無夠工錢，5 分外地 ê 苦瓜 lóng kauh 落去做肥底， góan kui 家夥 á mā 食 1 年苦瓜，炒苦瓜、苦瓜湯、豉鹹做苦瓜 kê ，食 gah kui 厝內 lóng 變苦瓜面，真正是苦年。莫怪 a-pa 會 hiah 氣這個破格兼 hau-siâu ê 成--á 。

成--á 聽到是 a-pa beh 請 i 來看--我 ê ，無掛半暝 á 冷 ki-ki ，藥箱 á phāiⁿ leh 隨就拚--來，看我 ê 舌， péng 我 ê 目 chiu ， koh jih 我腹 tó ， ná 問講：「你有食 siáⁿ-mih khah 罕見 ê 物件--無？」「Beh 暗 á 時我 tī 厝後樹 á kha 挽著幾蕊草菇，i--a 煮飯 ê 時，我 khē tī 灶空 pū 熟，食了--a。」

「He 草菇有 ê 有毒，che 需要診斷 kap 治療。」

Góan a-pa 應 i 講：「騙 siáu--ê ! he 草菇 góan tiāⁿ-tiāⁿ 挽 leh 食，若有毒，

kui 家夥 á 早就 thāu 死了了--a 。i 是腹 tó 疼，緊 kā 注射--lah ，mài 講 he siáⁿ-mih leh 真緞假緞 iah 是豬寮牛寮--ê 。」

成--á 替我 kā 腹 tó jih-jih--leh ，感覺有影 khah bē hiah 疼，包藥 á 叫我隨食，無 jōa 久，我就真正暈--去，m̄ 知 thang 疼--a。食 2 工藥 á kap ám 糜 á ，我 ê 腹 tó 疼就好--a 。雖 bóng 是成--á kā 我醫好--ê ，m̄-koh i kan-taⁿ 叫我食 kóa 藥 á ，也無注射，我無感覺 i 有 siáⁿ 醫術，a-pa mā 無改變對 i ê bái 印象。

隔壁庄--nih 有 1 個 A 麗--á ，是無 chiok 月出世--ê ，人是親像名 án-ni 生做有美麗，m̄-koh 頭殼無 kài 好，現代話講是「智能不足」。普通時無論 siáⁿ 人 kap i 講話，i lóng 會文文 á 笑，若 mài 講破，會感覺 i 氣質真 chán 。A 麗 18 歲 hit 年 bat 有人來看過親 chiáⁿ ，cha-po gín-á 真 kah-í ，hit pêng ê sī 大人有拜託人去 in 庄頭 á 探親，人疼惜 A 麗，無講 i ê pháiⁿ 聽話，就來落 tiāⁿ ，cha-po gín-á mā 有約 A 麗出--去過，看這個姑娘無愛講話，無論 cha-po --ê 講 siáⁿ i lóng 甜甜 á 笑，想講 tiāⁿ-tiòh 是理想 ê 家後，就看日 beh 娶 tng 去做 gín-á ê a-i 。Nah 知結婚前 chiáⁿ 禮拜，未來 ê ta-koaⁿ-á m̄ 知 ùi toh 探聽著 A 麗 ê 頭殼有故障，反悔 soah 退婚，cha-po gín-á 有 kóa m̄ 甘，m̄-koh mā m̄ 敢違背 sī 大人。

A 麗 mā 可憐，hō 人退婚 mā 是面甜甜 á 笑，kāng 款 tī in 庄--nih 田頭 á 散步、挽花 khau 草 á 編花環插頭髮，mā 會 tī 溪 á 邊唱歌 hō ka-tī 聽。In a-i 早就過身--去，chhun 老 pē beh chhiáⁿ cha-bó kiáⁿ 有影 bē tàng hiah 貼心。A 麗自細漢就慣勢 ka-tī chhōe gī-niū ，m̄-koh l kóa gín-á 伴有時 á 會欺負--i ，hō i koh khah 孤單。In 老 pe 來 chhōe 成--á 講 A 麗 m̄ 知 án-chúaⁿ 這 chām-á 人 lóng siān-siān ，無 siáⁿ 愛食糜飯，腹 tó koh tiāⁿ-tiāⁿ 會悠悠 á 疼，請成--á 若有 êng 去 kā 看--1-下。

過無 jōa 久，成--á soah 會 chhōa A 麗來 góan 庄 chhit-thō ，tī 竹林 á 路散步，去油菜花田 liáh 蝶 á ，有時 i phāiⁿ 藥箱 á 出診 mā 會騎鐵馬載 A 麗，

人風聲講：「成--á kap A 麗大概有 siáⁿ 曖昧。」我 bat tī 店頭 á 聽 a-pa kap 1 tīn 大人開講，有人講：

「A 麗是文 siáu m̄ 是武 siáu，人 koh súi-súi--á，成--á 大概 beh 娶 i tng 來做 bó。」

A-pa 應講：「Siáu A 麗是真可憐，破格成--á 真無良心，連 án-ni ê 人都騙會落手。有影是 sià 世 (sì) sià 眾 cheng。」

我問 a-pa：「A 麗 in tau kám 是好 giáh 人？無，成--á 是 beh 騙 i siáⁿ？」

A-pa 罵我：「Gín-á 人有耳無嘴，大人講話 mài 聽。」

真正過無 1 個月，A 麗 in 老 pē 來 góan 庄 tâu 莊書文先生，莊--先生是 chia ê 頭人，koh 兼做鎮民代表。講 góan 庄 hit 個做醫生 ê 成--á kā in A 麗騙大腹 tó，若是普通正常 cha-bó gín-á 會 sái 講 ka-tī hiâu、ka-tī 興，i mā m̄ 敢過庄來 ka-ti chhōe kàin-siàu，m̄-koh A 麗 m̄ 知世事，請莊--先生替 i 做主。莊--先生真 siūⁿ-khi，叫成--á 來問，問 i beh án-chóaⁿ 解決。成--á 在來 chiok kāu 話--ê，到 gah 這地步 mā soah 無聲無說，頭 lê-lê tiām-tiām 據在莊--先生 kā 惡。尾手，莊--先生講 tãi-chi kah án-ni--a，無，就 A 麗娶娶--leh，對 in hit pêng chiah 有 1 個交帶，成--á 若肯，i beh 出面去講親 chiáⁿ。

成--á 娶 bó 是庄--nih 頭 1 個無放帖 á hō 人鬧熱--ê，kan-taⁿ 辦 1 桌請莊--先生陪 A 麗 in 老 pē，chhím 頭--á 連成--á in a-pa 都 m̄ 肯食桌，莊--先生去 kā 好嘴 ko-chiáⁿ chiah 來陪親 ke-á 坐桌。

成--á 結婚了，khah 無 leh 講破格話，m̄ 是 i 有 siáⁿ 改，是自 i kā A 麗 bú gah 大腹 tó 了後，庄內人看 i 無起，這款 m̄-chiáⁿ 人原本是 ài hō 人 phui 痰 phui nūa--ê，雖 bóng 有 kap A 麗結局，iáu 是 hōan 人 khia，我知影 i ùi 豬寮成--á koh 變做「Lah-sap 成--á」，就 thang 知影 i tī 庄內人心肝內 ê 地位。這款名聲會 sái 講臭 kiáⁿ-káiⁿ，beh nah 有人 beh kah chhōe i 來看病，hit kha 藥箱 á soah m̄-bat koh phāiⁿ --過。無 ta-ôa，換 phāiⁿ 1 kha 魚籠 á sí-kóe 圳溝 á liáh

魚 á khioh hô-liu ，總--是 chhōe kóa 油臊 hō 有身--ê 食營養。

A 麗生-- a ，是成-- á ka-tī khioh gín-á tng 臍-- ê ，庄 kha 人無 hiah gâu 記人 ê 欠點，成--á 悶油飯請--人，真 chē 人有去看 hit 個 cha-po 嬰--á ，mā kā in 翁 bó 恭喜，kan-taⁿ a-pa káu-kòai ，m̄收 in ê 油飯，講成--á 真早就 kā A 麗 lām-sám 來， chiah 會新娘 chiah 半年就生 kiáⁿ ，hōan-sè 就是 án-ni ，A 麗 m̄ chiah 會去 hō 頭前 hit 個退婚。庄--nih-ê 想想算算--leh koh 有影， A 麗 ka-tī mā 是無夠月生--ê ， m̄-koh 無差 hiah chē ， nah 有人 chiah 6 個月就生。講--起-來這個 Lah-sap 成--á 有影夭壽骨！

嬰--á 滿月了， A 麗 hit 個無緣 ê ta-koaⁿ soah 來求莊--先生，講 beh 請 i 做主，講 in 後生本底 tī 農會食 thâu-lō ，kā A 麗退婚了後，換做 1 個修 chéng 甲 ê 姑娘 á ， mā kāoⁿ-tiāⁿ--a ， in 後生去 hak 1 台 otobái ， soah 去出車厄來不幸--去，beh 過身 ê 時有留遺言講 A 麗 hit 個 gín-á 是 i ê，望老 pē 去抱 tng 來養 thang 傳後嗣。若 m̄ 信會 sái 算 gín-á 是 tang 時有--ê， koh thèng 好去驗血。

成-- á kā 莊--先生應講：「講 gín-á 是我 ê 是你，這 chūn 你 koh 講 m̄ 是我 ê，你是地方 ê 頭人， nah 會 soah 講話顛顛倒倒？免驗，gín-á，就是正 káng 我成--á ê ，叫 siáng 來講 mā kāng 款。」

A 麗 gín-á 抱--leh， kan-taⁿ 文文 á 笑，做老母 ê A 麗比 khah 早 khah súi ， mā 真溫柔。

Koh 來，庄--nih koh 有人請成--á 去看病。無人 koh 叫 i 「破格成--á 」， m̄-koh iáu 是 m̄知 hit 句「治療」ê 意思， mā kāng 款尊稱 i 「豬寮成--á」。